

>> BERITA > NASIONAL > Dinamika perkhidmatan awam penuh aspirasi rakyat dan negara

Dinamika perkhidmatan awam penuh aspirasi rakyat dan negara

Oleh MUHAMMAD AMNAN HIBRAHIM || 22 November 2021



Yang di-Pertuan Besar Negeri Sembilan, Tuanku Mukhriz Tuanku Munawir selaku Canselor Universiti Kebangsaan Malaysia (UKM) (tiga dari kanan) ketika mengurniakan Anugerah Alumni Tersohor UKM kepada Mohd Khairul Adib.

Sektor perkhidmatan awam perlu ditransformasi seiring dengan perubahan nilai yang berlaku dalam keseluruhan aspek kehidupan masyarakat Malaysia meliputi politik, sosial dan teknologi.

Ketua Pengarah Perkhidmatan Awam (KPPA), Tan Sri Mohd Khairul Adib Abd Rahman berkata, persepsi masyarakat terhadap penjawat awam kini sudah jauh berubah berbanding ketika tempoh selepas kemerdekaan.

Menurutnya, masyarakat Malaysia kini dilihat mahu lebih aktif dalam proses libat urus dan pembentukan polisi yang dilaksanakan kerajaan.

“Dahulu, masyarakat hanya terlibat lima tahun sekali iaitu ketika mereka mengundi dalam pilihan raya, tetapi mereka kini menghendaki kerajaan untuk sentiasa melibatkan mereka dalam pembentukan polisi.

“Sekarang ini, masyarakat sudah beranggapan kerajaan dan penjawat awam adalah sebagai pemudah cara untuk memastikan kelangsungan hidup masing-masing.

“Penjawat awam perlu lebih aktif dalam perkhidmatan dan proses libat urus yang dijalankan bersama rakyat,” katanya.

Beliau berkata demikian ketika Sesi Town Hall bersama warga Universiti Awam (UA) dan pelajar tajaan Jabatan Perkhidmatan Awam (JPA) yang bertemakan ‘Bangsa Berilmu, Semarak Aspirasi Negara’ di Dewan Canselor Tun Abdul Razak (Dectar), Universiti Kebangsaan Malaysia (UKM), di sini pada Selasa.

Sebelum sesi tersebut, Mohd Khairul Adib turut menerima Anugerah Alumni Tersohor UKM sebagai pengiktirafan terhadap sumbangan dan pencapaian cemerlang beliau dalam Perkhidmatan Awam di Malaysia dan UKM.